

DIDZA' BURÓP BSÖLĒ'Ē PABLO YÖDZ TESALÓNICA

**Pablo rugapë' Dios bunách
queë' Cristo nacu'ë Tesalónica**

1 Neda', Pablo, dzagquë' neda'
Silvano len bi'i Timoteo,
rugapa' Dios lbi'ili', nacli' queë'
Xuzru' Dios len queë' Xanru'
Jesucristo, zoali' Tesalónica.
²Rnabtu' lahuë' Xuzru' Dios len
lahuë' Xanru' Jesucristo, uzá'
ladxë' queëli' len gunë' ga soa dxi
icj ladxidau'li'.

**Dios gchuguë' quegac bunách
dul-la' cati' huödë' Cristo**

³Ral-la' guiétecztu'-në' Dios:
Xclenu', ca nac queëli', böchi' lza'tu',
ati' nac dxi'a guntu' cni, le zeaj
ractër gdu ca réjlë'li' Dios. Lëzca'
cni, ca nadxi'ili' lza'li' tuli' yetuli'
zeaj racr gdu. ⁴Qui lë ni na', len
yöl-la' rudziji rguíxjöt'u' ca nac
queëli' laugac bunách queë' Dios
ni, le rbözli' zxon ladxí', len réjlë'li'
Dios zal-la' sxzöni ta'bía ladxí'gac
lbi'ili' bunách len sxzöni rzaca'
rgui'li', san rua' rlenli'. ⁵Yugu' lë ni
tac bë' nac tsahui' ca rbequi xbeynë'
bunách Dios. Ru'ë latj rzaca' rgui'li'
na'a, quië gacli' lsaca' tsazli' ga ni'
rna bë'ë Lë'.

⁶Nac tsahui' ca gunë' Dios, ubi'ë
quegac nup tu'saca' zi' lbi'ili', gunë'
ga la'zaca' la'guí'li' nup na'. ⁷Yetú
ca', lbi'ili' rzaca' rgui'li' na'a, ati'
ubi'ë queëli' Dios, gunë' ga uzí'
ládxi'li' tsaxxón len netu', dza ni'
gla' lahuë' Xanru' Jesucristo, grujë'
yehua' yubá. Lunë' Lë' tsaxxón gbaz
la'y ni'a në'ë, len lulu'ë lahui yöl-la'
huac zxon queë'. ⁸Gla' lahuë' Cristo
dza ni' ca tu gui' zxon cati' ni' uzí'
lë' nup cunúnbë'gac Dios len cutún
ca rna didza' dxi'a queë' Xanru'
Jesucristo. ⁹Bunách cni, uzí' lë'
lequë', ati' tsaz tsajtsu'uquë' lu gui'
gabíl. Tsaz la'cuitë' lahuë' Xanru'
len ga nala'gac yöl-la' yení' queë'
len yöl-la' huac zxon queë'. ¹⁰Cni
gac dza ni' cati' huödë' quië gac
queë' yöl-la' ba ni'a qui le nacgac
bunách la'y queë', ati' lubani queë'
ca nacgac yúgu'të nup ta'yeylë' Lë'.
Cni gac ca' queëli' le gyéjlë'li' le
bentu' lna' lau qui lauli' ca nac
queë' Jesús.

¹¹Qui lë ni na' ca', rulídztecztu'-në'
Dios queëru', rnábitu'-në' gáclenë'
lbi'ili', len gunë' ga gacli' lsaca'
gdél-li'li' lë na' bulidzë' lbi'ili' quië
uzi'li' xbey. Lëzca' rnabtu' lahuë'
gunë' ga gac gdu yúgu'të le rui'

ládxi'li' gunli' le nac dxi'a len yúgu'tè dxin runli' lu yöl-la' rejlè' queèli' Lè'. Len yöl-la' huac queè' Dios gunli' lè ni. ¹²Cni gac, gac yöl-la' ba qui lè' Xanru' Jesucristo ni'a qui le runli', ati' gacli' lbi'ili' bica' ba ni'a qui le gunè' Lè', gac ca nac le buzá' ladxè'è queèli' Dios queèru' lenca' Xanru' Jesucristo.

Uluí' lahuè' Bönni' Xöhui'

2 Na'a, ca nac qui dza huödè' Xanru' Jesucristo, len ca gac, dutubè' rè'u queè' Lè', ráta'yutu' lauli', böchi' lza'tu', ²cui güi'li' latj nu gun chixi lbi'ili' ca nacgac le gzxi' lu na'li'. Cutu cuequi bagu'i icj ládxi'dau'li' ni'a qui bi ta'guáxjö'è bönni' ta'zí' ye'è, ta'né' zóalenè' lequè' Dios Bö' La'y, o ni'a qui bi didza' tui' bunách, o ni'a qui bi nayúj tu lu guich ta'né' netu' bsóla'tu', le ta'ná: “Chgdöd dza huödè' Xanru’.” ³Cutu ca' güi'li' latj nu si' ye'i lbi'ili', le cutu gdxin dza ni' huödè' Jesús chqui' cutu la'lá' lahui zi'al zian nup la'dá'baga' Dios, ati' gla' lahuè' Bönni' Xöhui', bönni' na' ral-la' tsaziè' lu gui' gabíl. ⁴Bönni' ni zgaüè'è, len lu yöl-la' run ba zxön cuinè' tá'baguè'è yúgu'tè le naqui queè' Dios o le tun zxön bunách lu yöl-la' run Dios ba la'n quequè'. Gunè' cni bönni' na' ga gdxintè cö'è ca Dioscz lu gdaul ga nac xlatjè' Dios, len gun cuinè' ca Dios.

⁵¿Naru' cu rajneyli' gdíxjöi'da' lbi'ili' yugu' lè ni cati' ni' zóalena' lbi'ili'? ⁶Na'a, núnbè'li' Nu ruzaga' xnözè' Bönni' Xöhui' na', cui gla' lahuè' zi'al ga gdxin dza queè'. ⁷Chrun dxin le nagachi' qui le nac

xöhui', san na'atè zoa Nu ruzaga' xnözè' Bönni' Xöhui' na' ga gdxin dza ucuti' cuini Nu na' ruzaga' xnözè'. ⁸Ni'r gla' lahuè' Bönni' Xöhui' na', ati' Xanru' Jesucristo uxicjè' lè' len bö' gruj ru'è, len usnitiè' lè' len le tsöp yös yení' qui dza huödè'. ⁹Cati' gdxinè' Bönni' Xöhui' na', len yöl-la' huac qui Satanás tu' xöhui' gla' lahuè'. Len yöl-la' huac qui le cunác, gunè' yúgu'tè yöl-la' huac zxön, len yúgu'tè le lac bè', len yúgu'tè le lun ga lubani bunách. ¹⁰Len yöl-la' huac qui le cunác, gunè' cni laugac nup la'nít le cugulazí' lu na'què' gdu ládxi'què' le nac gdutè li, quiè lulé'. ¹¹Qui lè ni na' Dios gu'è latj gdxin quequè' tu le run yöl-la' huac le si' ye'i lequè' quiè la'yejlè'è le cunác. ¹²Cni gac quiè la'baga' xzguia' yúgu'tè nup cutu gulayejlè' le nac gdutè li, san guladzág ládxi'gac le cunác tsahui'.

Nup gröczè' Dios quiè lulá

¹³Böchi' lza'tu', lbi'ili' na' nadxi'inè' lbi'ili' Xanru', ral-la' guiétecztu'-nè' Dios: “Xclenu’”, ni'a qui le nac queèli', le chgröczè' lbi'ili' Dios dza ni'tè quiè ulali' ni'a qui le runè' Dios Bö' La'y, quiè gacli' gdu dxi'a le réjlè'li' le nac gdutè li. ¹⁴Quiè gac cni queèli', Dioscz bulidzè' lbi'ili', quiè gdél-li'li' gunli' tsaxón Xanru' Jesucristo lu yení' queè'. Cni gac ni'a qui didza' dxi'a runtu' lban qui.

¹⁵Qui lè ni na', böchi' lza'tu', gul-zóa tsutsu len gul-gún chi'i didza' na' nazèdli', le bé'lentu' lbi'ili' len buzujtu' queèli' lu guich. ¹⁶⁻¹⁷Rnabtu' lahuè' Xanru'

Jesucristo len lahuè' Xuzru' Dios, utipè' ládxi'li' len gunè' ga gacli' tsutsu ca nac yúgu'tè le nac dxi'a runli' len yúgu'tè didza' dxi'a rui'li'. Lèczè' nadxi'inè' rè'u len bennè' queèru' le ruhuí' zxóntecz rè'u len le nac dxi'a runru' löz, yugu' lè na' buzá' ladxè'è queèru' Dios.

Le ral-la' gnábiru'-nè' Dios

3 Yetú ca', böchi' lza'tu', gul-lidzè' Dios gnábili'-nè' gáclenè' netu', runtu' lban ni, quiè sè xtídzè'è Xanru' ati' lun lei ba la'n bunách, gac ni ca na' guc ga ni' zoali'. ²Gnabli' ca' quiè ulatu' lu na'què' bönni' xöhui' tua'dö', le cutu ta'yejlè' Dios yúgu'tè bunách. ³Na'a, le runè' ca rnè' Xanru', gunè' ga gacli' tsutsu len gun chi'è lbi'ili', cui gdzunli' lu na' tu' xöhui'. ⁴Ruzxóni ládxi'tu'-nè' Xanru' ca nac queèli', gunli' yugu' lè ni zi'a gnabtu' lauli', ca na' chrunli'. ⁵Rnabtu' lahuè' Xanru' usé'è ládxi'li' quiè gdxili'-nè' Dios, len cözli' zxón ladxí' ca na' benè' Cristo.

Ca run bayúdx gunru' dxin

⁶Ni'a qui lè' Xanru' Jesucristo rna bé'itu' lbi'ili', böchi' lza'tu', gcuitli' ga nacu'è böchi' lza'ru' ta'dazè' ca' len cutu tunè' ca nac zxba buséditu' lbi'ili'. ⁷Nózcizli' ral-la' gunli' ca runtu' netu', le cutu ca' gdaztu' ca' netu' ga ni' zoali'. ⁸Cutu gdagu dáduztu' le bennli' queètu', san lu yöl-la' ruúbi ruguí' len lu yöl-la' rcuidi' bentu' dxin rël len tè dza cui usaca' zi'tu'

nituli' lbi'ili'. ⁹Cni bentu' quiè gactu' lauli' ca tu le ruluí' lbi'ili' ca ral-la' gunli', zal-la' dè lu na'tu' gnabtu' bi gunli' queètu'. ¹⁰Lèzca' cati' ni' gzóalentu' lbi'ili', gna bé'itu' lbi'ili' cni, le rna: “Chqui' cutu rè'nnè' gunè' dxin nu bönni', cutu güi'li' le gahuè' bönni' na'.”

¹¹Cniz rnatu' le ryónitu' nútsa'què' ladjli' bönni' ta'dazè' ca', cutu bi dxin tunè', san ta'dazè' ca' bi tun bi ta'né'. ¹²Ni'a queè' Xanru' Jesucristo rna bé'itu' bönni' tunè' cni, len ruchiztu' icj nagquè' lunè' dxin lu yöl-la' rböz dxí'adau', quiè gac lahuè' le naqui quégaczè'.

¹³Na'a, böchi' lza'tu', cutu soa dxili', gúnteczli' le nac dxi'a.

¹⁴Chqui' núti'tèz bönni' cutu gunè' ca rna xtídza'tu' ruzujtu' lu guich ni, gul-gún ga gac bè'è bönni' na', len cutu gunli' tsazxón lè' quiè utui'nè'.

¹⁵Cutu ral-la' glé'ili'-nè' ca bönni' curlé'inè' lbi'ili' dxi'a, san gul-sá' ladxè'è ca bóchi'czli'.

Pablo rgu'è lu nè'è Dios böchi'ru' nacu'è Tesalónica

¹⁶Rnabtu' lahuè' Xanru' gúnteczè' ga soa dxi icj ládxi'dau'li' ca nac yúgu'tè le runli' len sóalenè' yúgu'tèli'. Lèczè' runè' ga zoa dxi icj ládxi'dau'ru'.

¹⁷Neda', Pablo, len na'cza' ruzuja' lu guich ni le rugapa' Dios lbi'ili', ati' nac tu le nac bè' yúgu'tè guich rsöla'a. Cniz ruzuja' lu guich.

¹⁸Le ruzá' ladxè'è queèru' Xanru' Jesucristo gac queèli' yúgu'tèli'. Ca' gac.